

A mantene normanan internacional halto cu bon resultado

Hospital a score bon den evaluacion di prome “Open Hart Missie”



NA cuminsamento di aña 2012 a habri combersacionnan tocante e posibilidad pa realisa intervencionnan cardiologico na Dr. Horacio E. Oduber Hospital y asina provee pashentnan tratamento di nan condicion

den un ambiente familiar, en bes di tin cu manda nan pa tratamento den exterior. Despues di algun luna, como cu no por a logra construi un centro pa intervencionnan cardiologico den e tempo desea, e atencion

a bay den direccion di cirugia di curason.

E partnernan local den e proyecto aki ta hospital, e cardiologonan, Gobierno y AZV, cu a traha hunto pa atrae un team di Hulanda. Algun luna despues di a realisa e prome mision pa cardiologia na Aruba, Hospital a organisa un conferencia di prensa pa comparti cu comunidad di Aruba e resultadonan sumamente satisfactorio di un evaluacion cu a wordo haci pa Profesor Robert Klautz. E especialista Hulandes a haci un asina yama “Medical Audit” riba peticion di e partnernan den e proyecto. E profesor a tuma como guia e normanan manteni na Hulanda pa Nederlandse Vereniging voor Thoraxchirurgie.

Theo de Kool, kende ta miembro di e Raad van Bestuur di Hospital, a expresa cu nan ta hopi contento di por a realisa e prome mision aki cu a rekeri masha hopi preparacion y consecuentemente a duna hopi bon resultado. A traha conforme na e normanan Hulandes y a logra yega y mantene e nivel aki tambe.

Ta algo hopi special pa un hospital chikito manera esun di

Aruba realisa un proyecto asina. Misionnan di e tipo aki ta hopi beneficioso tanto pa e pashent, kende ta wordo trata den un ambiente familiar y cu su familia cerca, como pa e personal di hospital. E personal di hospital cu esaki ta haya e oportunidad pa desaroya nan habilidadnan y experiencia den e ramo aki. Tin hopi interes di parti di e personal y pa e siguiente misionnan lo nan bay hunga un rol cada biaha mas grandi, asina Theo De Kool a expresa. Proyectonan asina ta bon pa desaroyo di mas specialisacion den Hospital y ta bon pa Aruba.

Medical Audit

Profesor Klautz a splica cu el a haci su evaluacion for di Hulanda, uzando tres fuente di informacion: tur documento concerniendo e preparacionnan (acuerdonan, protocolnan, proceduranan, etc.), tur e informacionnan produci pa e personal medico Hulandes y tur dossier di e nuebe pashentnan.

El a bisa cu el a haci un evaluacion completo di e dossiernan, cu ta inclui tur informacion completo di con a prepara e pashent pa su operacion, instruccionnan pa cada pashent, e checklistnan necesario pa cada un, con e operacionnan a bay y e cuido cu a sigui.

Tur operacion a bay sin problema, a wordo haci manera discutiti di antemano y den e tempo proyecta. E bypassnan a wordo efectua segun e normanan di mas halto, e profesor a remarca.

Pa loke ta e fase “post operatief”, o sea despues di e operacion, esaki a bay bon, unda cu mayoria di e pashentnan por a bay cas despues di un siman; dos of tres a sufrir di fibrilatie y un pashent a keda un poco mas largo hospital pasobra despues di e operacion e tabatin mester

di haya un “pacemaker”.

Cardiologo, dr. Casper Lacle a splica cu e ultimo aki no tabata un complicacion despues di e prome operacion, pero ta algo cu ta entre e situacionnan cu por presenta y semper ta tene cuenta cune den e tipo di operacion di e pashent aki.

Profesor Klautz a conclui cu e cuido di e nuebe pashentnan a bay completamente segun procedura y tur proceso a bay bon. Tur esunnan cu a participa na e prome mision aki ta hopi satisfecho cu e comunicacion den e team y e resultadonan di e proyecto.

Den e Medical Audit a inclui algun recomendacion y algun ta cosnan cu ya ta wordo haci of ta planea caba, segun Klautz. E recomendacionnan aki tin di haci cu entre otro registracion, e seguimiento di audit di cada caso despues di e proceduranan, resultadonan y “kleppenregistratie”.

“Mi ta spera cu cirugia di curason lo tin un bunita futuro na Aruba”, Professor Robert Klautz a conclui bisando.

Documentario

Dr. Horacio E. Oduber Hospitaal ta invita comunidad henter pa sigui e desaroyo importante aki den e mundo medico na Aruba mas di cerca. Pa un miho idea di con e prome operacion a bay, sintonisa TeleAruba diahuebs awo, 25 di september, pa 7’or di anochi pa e documentario “Bo Curason...den nos man!”

E documentario, cu un duracion di 30 minuut, ta sigui e prome pashent cu a haci un “open hart operatie” na Aruba durante e proceso di preparacion, operacion y post-operacion, ilustrando momentonan di hopi emocion y curashi.